

10. marts 2026

UPA 2026/68

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Ulluunerani paaqqinnittarfinni tamani inimi ataatsimi atorfiit akuerisaasut minnerpaamik sisamangortinneqarnerisigut aningaasatigut, allaffissornikkullu kingunissaanik ersarissaasumik nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Olsen, Demokraatit)

Tunngavilersuut

Ulluunerani paaqqinnittarfiit inuiaqatigiinnitsinni tunngaviit pingaarnersaasut ilagaat. Meeqqat amerlasuut eqqumanermi annersaa tassaniittarput, tassanissaat toqqissisimaneq, atassuteqaatit, ineriartornerlu aallartittarlutik. Taakkua pinerini ulluunerani paaqqinnittarfinni sulisut – perorsaasut, sulisut, sulisullu allat – meerartatsinnut ullut tamaasa sunniuteqartarput.

Demokraatit aallarniutigalugu qujarusupput. Sulisunut akisussaassuseqarlutik, piginnaasaqarlutik, isumassuillutillu suliaartortartunut qujanaq. Ulluni sulisut amigartillugit, suleqatit napparsimatillugit, suliaassallu piffissaqarfigineranit amerlanerutillugit ulapittartunut immikkut qujanaq.

Nalilerneqarsinnaanngitsumik sulipput, atugassarititalu akisussaaffigisaminnut naapertuutinnikkajuttartut atugarisarlugit. Kisianni ilumoorsinnaanngilaq ulluunerani paaqqinnittarfinni sulisut ullormut suliaassatik naammassiniarlugit angummanniapiloortassammata.

Ulluunerani paaqqinnittarfippaalunni sulisunik amigaateqarnerup malitsigisaanik sulisut ulaperuluttarput. Sulisut suliaassat arlallit ataatsikkut isumagisariaqakkajuttarfaat – matumani igaffimmiuuneq aamma eqqiaasuuneq ilanngullugit – taakkualu meeqqat ilaginissaraluanit piffissamik tigusisarlutillu timikkut, tarnikkullu oqimaarsarneq annertusisarlugu. Naalakkersuisut isumaqatigaat sulisussaaleqineq sulinikkut nanertisimanermik annertusaasinnaasoq, taamaalillunilu ulluinnarni paaqqinnittarnerup pitsaassusianut sunniuteqarsinnaasoq¹.

Atorfiit akuerisaasut ikippallaaraangata sulisut kisimik eqqorneqarneq ajorput. Meeqqanut aamma sunniuteqartarpoq. Ulapinneq, akornusersortikkajunnerillu toqqissisimananngitsumik sinaakkuteqalersitsisarput, ataavartitsineq annikinnerulersarpoq, taavalu qanilaarnissamut, perorsaanermi itisiliinissamut, siusissumillu iliuuseqarnissamut periarfissat annikinnerulersarlutik. Ilutigisaanik stressileratarsinnaanermut, napparsimalluni sulinngeratarsinnaanermut, sulisullu soraaratarsinnaanerinut

¹ § 37 naapertorlugu apeqqut normu 003-2026-mut akissut



annertusaaqataasarpoq. Iluarsinngippat tamanna iluarsisinnaanani uteqattaaginnalissaaq.

Demokraatit isumaqarput, ulluunerani paaqqinnittarfinni sinaakkutitut Inatsisartuni aaqqissuussamik akisussaaffimmik tigusinerunissarput piffissanngortoq. Sulinermi atugassarititanik allanngorannginnerusunik pilersitsinissamut, paaqqinnittarfiit iluini eqaannerusumik periarfissaqalersitsinissamut, tassanngaannartumillu paarlatseqarnissamik pisariaqartitsinnginnerunissamut, inimi ataatsimi atorfiit akuerisaasut minnerpaamik sisamanngortinneqarnerat sakkussaasinnaavoq pingaarutalik. Ulluinnarni sulisut amerlaruppata meeqqanut, sulisunullu eqqissisimanerulersitsisinnaavoq.

Taamaakkaluartoq Naalakkersuisut paasissutissiissutigaat, sukumiisumik qulaajaasoqartinnagu taamatut atorfinnut minnerpaatut akuerisaasunut aningaasatigut, allaffissornikkullu kingunisai illersorneqarsinnaasumik suliatigut tunngaveqartumik naliliisoqarsinnaanngitsoq. ilaatigut init amerlassusiinik naatsorsuinerit, maannakkut sulisoqarneq, atorfinitsitsinissamut periarfissat, akissarsiat isumaqatigiissutillu pillugit pissutsit, kiisalu kommunit akornanni nunap inissisimaffiatigut aaqqissuusnaanikkullu assigiinngissusaat pillugit naatsorsuinerit pisariaqartinneqarput. Tamannarpiaq pillugu aalajangiiffigisassatut siunnersuut manna pisariaqarpoq.

Massakkoqqissaaq atorfiit akuerisaasut aalajangersarneqarnissaat siunertaanngilaq, kisiannili pitsaasumik aamma paasissutissanik tunngavilimmik aalajangiinissami tunngaveqarnissaaq qulakkiissallugu siunertaavoq. Minnerpaatut atorfiit akuerisaasut qanoq kinguneqarnissaannik – aningaasatiguinnaanngitsoq, aammali sulinermi avatangiisinut, napparsimalluni sulinngittarnernut, sulisut pigiinnarneqarnissaannut, meeqqallu ulluinnaasa pitsaassusaannut kingunissaannik – Inatsisartunut naliliinissaannut nassuiaat periarfissiissaaq.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

Nassuiaasiornermut atatillugu aningaasartuuteqassaaq. Taakkua ilisimatusartut ukiumut sulinerat 500.000 koruuniusut qaangissanngikkaat naatsorsuutigineqarpoq.

Namminersortunut aningaasatigut allaffissornikkullu kingunerisassai

Nassuiaasiornermut atatillugu kingunissaqanngilaq.

Innuttaasunut aningaasatigut allaffissornikkullu kingunerisassai

Nassuiaasiornermut atatillugu kingunissaqanngilaq.